

14/11/2003

Dewan ucap terima kasih kepada Dr M

Hasnira Hassan

MELAKA: Persidangan Bajet (ketiga) Penggal Kelima Dewan Undangan Negeri yang berakhir semalam membentangkan usul ucapan terima kasih kepada bekas Perdana Menteri, Tun Dr Mahathir Mohamad dan ucapan tahniah kepada Datuk Seri Abdullah Ahmad Badawi selaku Perdana Menteri yang baru.

Ketika membentangkannya, Ketua Menteri, Datuk Seri Mohd Ali Rustam, berkata Dr Mahathir adalah seorang pemimpin unggul dan banyak berjaya kepada negara dan Melaka.

Katanya, kewibawaan Dr Mahathir sebagai Perdana Menteri selama 22 tahun amat terserlah dan terkenal bukan saja di rantau Asia, bahkan di seluruh dunia sama ada di kalangan negara sedang membangun dan negara maju.

"Ketokohnya dikagumi dunia, kebijaksanaannya disegani dan keberaniannya menyatakan yang hak dan menegakkan keadilan sejagat sangat dihormati kebanyakan negara, khasnya negara Islam.

"Sebagai seorang negarawan berwawasan, Dr Mahathir telah memacu negara ke arah negara maju melalui landasan yang betul. Selama 22 tahun menerajui negara dengan penuh dedikasi, tegas, cekap, berkesan, cemerlang dan bijaksana.

"Dr Mahathir berjaya meletakkan kedudukan Malaysia sebagai sebuah negara membangun yang terkehadapan dan terkemuka," katanya.